



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

52. Kalenderwoche – ab 25. Dezember 2010

Scheene Beschärung

Isch soll nu jedzde unvorhoffdor Weise doch noch Milljonähr wern! Isch kanns noch gahr nisch richsdisch gloom... so aus heidorm Himml bledzlish reisch!

Wo isch schon lange mid dem Dhema "Reischwern" abgeschlossn hadde. Isch dachde eischendlich, dass sich das fiehr misch in dähm Lähm erledischd hädde... isch hadde nu ma keene reischn Eldorn un im Loddod haddsch ooch nie Gligg, un zur Wende warsch ehm ooch nisch am rischdischn Flegg. Wensch da villeischd in Rußland gewähsn sein däde... wo die ihre gesamde Indusdrie un de Bodnschädze vorglobbd ham... - naja, dor Abramowidsch hads ja ooch geschaffd! Womeeschlich häd isch das ooch hingegrischd! Mor hädde ehm bloß damals zur rischdischn Zeid an dor rischdischn Schdelle hoggn missn!

Nee, abor nu had das Schigsahl e Einsähn gehabbd un dud mir endlich ma zuläschln! Un ooch noch in dor Weihnachtszeit! Eene scheene Beschärung - da is von dor Frau Lillian Anderson aus Mischigan in de USA iebor Indorned eene Ihmeehl bei mir eingedroffn, wo mir de Frau Anderson middeiln dud, dass se e Haufn Geld von ihm Mann geerbd had un nu selbor bald schderm muß. Dor Mann von dor Frau Anderson is bei dor USA-Armee e hohes Dier gewähsn un had als Vormäschnis hinnorlassn, dass mid dähm Geld jemand unnorschdidzd wern soll, dähr deutsch schbreschn dud. Ja, un da is ehm de Frau Anderson off misch gekomm. Obwohl isch ehm nisch direggd hochdeutsch schbreschn du - abor da siehd mor ehm, dass indornadsjonahl das Sächsich ooch als Deutsch geldn dud!

Jednfalls - isch soll von dor Frau Anderson sechs Milljohnen un achhunnorddausend englisch

Bfunde grischn! Isch brauch misch bloß an Ihrn Anwald in London wendn. Eene Ihmeel-Adresse war gleisch dabei. So, bis jedzde also alles vom Feinsdn! Abor nu dud meine Gudste eingreifn un dazwischnfunkn! Isch Idjod soll doch nisch off so een Bleedsinn reinfalln, das däde doch bloß irschendeene Vorscheißorei sein, wo mor am Ende womeeschlich noch Geld bezahln muss. Du dusd nisch andwordn, had se gesachd.

Dscha, was nu? Soll isch misch iebor de Anweisung von meinor Gudstn eenfach hinwegsedzn? Kanns nisch werglich jemand gähm, dähr mir wohlgesonn is? Weil isch so e neddor Mensch bin? Odor währ weeß wesweeschn!? Kanns nisch werglich sein, dass das Schigsahl mir geschniebor ma so rischdisch großzieschisch is?

Nee, das kann werglich nisch sein! Isch bin dähm Schigsahl bis jedzde schießbegahl gewähsn, warum soll das jedzde bledzlich anfang, sich um misch zu kimmorn? Nee, soll doch de Frau Anderson mid ihm Geld... abor wenn das nu doch keene Vorscheißorei is? Sechs Milljohn achdhunnorddausend... ???!!!! Herrgodd gib e Zeeschn!

Eduard Sachsenmeyer